

SISTEM CARINSKE KONTROLE OTPADA U BIH

Bosna i Hercegovina je 2000. godine pristupila Konvenciji o kontroli prekograničnog kretanja opasnog otpada i njegovom zbrinjavanju („Službeni glasnik BiH- Međunarodni ugovori“, broj: 31/00).

Sa ciljem smanjenja obima prekograničnog kretanja opasnog otpada i izvršavanja međunarodnih obaveza koje je BiH preuzela ratifikacijom pomenute Konvencije, Savjet ministara BiH, na prijedlog Ministarstva spoljne trgovine i ekonomskih odnosa BiH je na 74. sjednici, održanoj 22. septembra 2016. godine, donio Odluku o uslovima prekograničnog kretanja opasnog otpada u skladu sa Konvencijom o kontroli prekograničnog kretanja opasnih otpada i njihovom zbrinjavanju („Službeni glasnik BiH“, broj: 83/16).

Nadzor nad provedbom Odluke obavljaju nadležna entitetska ministarstva i Brčko distrikt, u skladu sa zakonskim propisima iz njihove nadležnosti:

- Zakon o upravljanju otpadom (“Sl. glasnik Republike Srpske”, broj 111/13, 106/15, 16/18, 70/20),
- Pravilnik o dokumentaciji za izdavanje dozvole za uvoz i izvoz otpada (“Sl. glasnik Republike Srpske”, broj 5/16),
- Zakon o upravljanju otpadom Federacije BiH („Službene novine Federacije BiH“, broj 33/03, 72/09 i 92/17),
- Pravilnik o prekograničnom prometu otpada („Službene novine F BiH“ broj 7/11),
- Zakon o upravljanju otpadom („Službeni glasnik Brčko distrikta BiH“, broj 25/04, 1/05, 19/07, 2/08, 9/09).

Izvoz/uvoz opasnog i neopasnog otpada predmet je izdavanja pisanog odobrenja/dozvole od strane ovlaštenih institucija u BiH.

Ovlaštene institucije su:

- u Republici Srpskoj - Ministarstvo za prostorno uređenje, građevinarstvo i ekologiju Republike Srpske,
- u Federaciji Bosne i Hercegovine - Federalno ministarstvo okoliša i turizma i
- u Brčko Distriktu - Vlada Brčko Distrikta, Odjel za prostorno planiranje i imovinsko-pravne poslove.

Ministarstvo vanjske trgovine i ekonomskih odnosa BiH, kao središnje kontakt mjesto, razmjenjuje informacije i obavijesti sa Sekretarijatom Konvencije i ovlaštenim institucijama, predstavlja Bosnu i Hercegovinu na Konferenciji potpisnica, obrađuje informacije u vezi s prekograničnim prometom opasnog otpada, vrši koordinaciju s ovlaštenim institucijama s ciljem izvršavanja obaveza preuzetih Bazelskom konvencijom, te preuzima i druge potrebne aktivnosti u okviru svojih nadležnosti, radi smanjenja prekograničnog prometa opasnog otpada na najmanju moguću mjeru i efikasnog upravljanja otpadom na način koji nije štetan za okoliš.

Uprava za indirektno oporezivanje vrši kontrolu uvoza/izvoza roba obuhvaćenih režimom dozvola, upoređujući dozvolu za uvoz/izvoz sa robom koja je predmet uvoza/izvoza.

Carinski organ dužan je prilikom uvoza/izvoza otpada, pregledati odgovarajuće dozvole i saglasnosti zavisno o propisanim zakonskim odredbama te ovjeriti prelazak granice u za to predviđenoj rubrici obrasca dozvole/saglasnosti.

Sve prekogranične pošiljke opasnog otpada uvoznik/izvoznik dužan je tri dana ranije najaviti Carinskoj službi – graničnom prelazu preko kojeg će se izvršiti uvoz/izvoz otpada. Prekogranični promet otpadom dozvoljen je samo preko određenih graničnih prelaza definisanih Pravilnikom o prekograničnom prometu otpadom (Službene novine Federacije BiH, broj: 7/11, 39/15, 25/19 i 19/21).